



RSS-i linük nüchiso atema raraba
nung shilem magi: Asaduddin Owaisi

Alaska senden sülen kecha nunga
meyongnem magütsütsü: Kremlin

Chennai nung Nagaland Angh La Ganesan süogo; State nung anogo 7 mangyimtsü



Chennai, Luroi/August 15 (Agencies): Nagaland Angh La Ganesan, shiba taoba mapang Rajya Sabha MP liasü, pa arishi küm 80 buba nung Hokulbar nikongdang Chennai nung süogo. Chennai nung T. Nagar nung par kidang August 8 nü alanga tekolak kanga mejungi yiruba anepalua Apollo Hospital nung munga liasü.

Kanga junga anepalua surgery agiaka pa nikongdang 6:23 ako nung tangola tatembang sashia lisü.

Mozüki osang ajanga ashiba agi, Ganesan ya par kidang süchia orr lia angu aser ICU bushia bener ao. Pa alangba ajanga tekolak telung nung zübu aliba doctor temi putet aser surgery agiaka pa temang tajungba makum.

Taoba hopta pa temang maneni tamajungba akum aser iba zübu ajanga asü.

La Ganesan ya Thanjavur district, Tamil Nadu nung aso aser Rashtriya Swayamsevak Sangh (RSS) ajanga yimtenren nung tetsüing ajemok aser Bharatiya Janata Party züngsem akum.

Pa dak ketdangsüba sempet tajung aliba den party ashi angaa aliba yong Tamil Nadu BJP tir akum aser Rajya Sabha nung Madhya Pradesh tenüing nung nokdaka liasü.

Küm aika pai talisa southern India nung BJP tashi itdaksü aser temulungsentsü teindang aser yimya tajung aliba atema ajaki akum agüja liasü.

2021 küm August ita pa Manipur indang Angh shim aser iba mapa February 2023 tashi inyak. Iba mapang pa nem July aser November 2022 tsüngta West Bengal indang Angh mapa tali nungloksü.

February 20, 2023 nü Ganesan ya Nagaland indang 21 buba Angh akum aser pa tasünü tashi iba bener nokdaka liasü.

Ganesan-i Angh mapa inyak tepiyong state sorkar tem den tesendaktep tajung yanglu aser Centre-i tuyuba ajak shidak inyaka liasü.

Tanü Nagaland Angh La Ganesan asüba asoshi kanga jashir, ta Nagaland Chief Minister, Dr. Neiphiu Rio-i sangdong ka nung ashi.

(Maneni tapak 8 nung...)

Foothills Road jembishinü nung Naga kin trok & NFHRCC adentsüla

Dimapur, Luroi/August 15 (TYO): Dimapur nung aliba Tribal HOHOs, Young Naga Action Committee on Foothills Road aser Nagaland Foothills Road Coordination Committee (NFHRCC) shisadokden senden ka August 14, 2025 nü Kher Mahal, Dimapur nung mena liasü. Iba senden nung Trans Nagaland Highway (Foothills Road) dak sendakba ken tatsü-talang jembir pangzüing kar renema liasü.

Mezüngbuba pangzüing nung, Trans Nagaland Highway (Foothills Road) indang jembishinüba nungi State sorkari asaa Naga kin trok (Chang, Khiamnuingan, Rengma, Sangtam, Tikhir, Yimkhiung) aser NFHRCC züngdoktsü mera agiba ya Nagaland nung aliba kin 13-i khenyongi magizüker, kechiase Naga nunger kin trok aser Committee yagi 2013 nungi

tenzüka Tizit nungi Khelma tashi Foothills Road Connectivity takok angutsü asoshi anir meranga inyaka aru, ta ashi.

Tang nungi tenzüka MLAs 45 aser NFHRCC medeni Trans Nagaland Highway (Foothills Road) indang jembishinütsü telemtetba agira, ibaji Nagaland nung kin 15-i magizüksü, kechiaser iba ken o nung parnok ya second-class MLAs ama mezüngshitsüla, ta tanabuba pangzüing ajanga ashi.

Mapang tetemsü aser yimya shidak amshia Nagaland Apex Tribal HOHOs ajunga aser NFHRCC den junga shisa magitepi Tizit nungi Khelma tashi Trans Nagaland Highway (Foothills Road) nung State sorkari tuyuba ama 30 meters width (Approx.99 ft) atema Right of Way (RoW) nung No Objection Certificate Certificate magütsütsüla, ta iba senden nung pangzüing liasü.

I-Day nung CM Rio-i yimjung aser terenlok asoshi lungjemtsü ayongzüik

Kohima, Luroi/August 15 (TYO): Nagaland Chief Minister Dr. Neiphiu Rio-i nüburtem dang telungjem tesunep aser sobaliba tajung wazüka ayutsü aser kasa mapang pei sasa pei peria inyaktetsü ayongzüka liasü.

Nagaland Secretariat Plaza, Kohima nung 79th Independence Day sentong nung nüchiso asoshi rarar aser linük asoshi takum bendanga agütsür nem akhum agüja jembidang, Constitution nung shia aliba nem len anidakja aser nüburtemi democracy aginüba ama state sorkari angatetsü tangatetba nung lir, ta Dr. Rio-i ashi.

Naga nunger yimten ken o tajungtiba nung bentetsü ya par sorkari teinyaktsü tongtipangtiba ta angatetdakja, "Teti asoshi tangatettep kati arutsü atema yimjung inyakyim ya teimla temaitsü lir, koba ajanga asen nübur mera ketdaksür," ta pai ashi.

Par sorkari Naga nunger yimten ken o jembishinüba nung maneni yakyaka yariteptsü ta pai ashi.

Frontier Nagaland Territory (FNT) akhangba onük jembidang, Eastern Nagaland People's Organisation (ENPO) ajanga arendaka bilembatem adianu indang tanüla nung angatetteptsü, ta pai ashi.

Indo-Myanmar arütsülen Free Movement Regime (FMR) kilometer 16 aliba Centre-i kilometer 10 akumtsü telemtetba agiba aser crossing points toku kumtsüba indang arendaka bilemba lemsatepdang, atsü-anem akatsü aser 'context-sensitive review' alitsü ayongzüik.

Assam arütsülen Disputed Area Belt (DAB) nung eviction drives agiba ajanga nüburtem shisabulutepba indang jembidang, status quo shidak amshitsü aser illegal migration nungi kumzüka alitsü mechi iba operations ya Assam den teka amteper inyaker, ta Dr. Rio-i ashi.

Sorkar inyakyim nung temelenshi aruba indang lemsatepdang, Inner Line Permit (ILP) agütsüba digital yimya dangi melenba ajanga applications tajungba nung ketdang asür aser 2025 küm tesadang tashinung online ajanga ILPs 26,500 dak tema agütsüogo aser alu mapa nung aayangertem, transporters, kidang yaritepertem aser dangartem asoshi ILP categories tasen tenzükogo aser entry points nung kanga junga miter, ta ashi.

CM-i agriculture,



Civil Secretariat Plaza, Kohima nung August 15, 2025 nü 79 buba Independence Day amungdang Nagaland Chief Minister, Dr. Neiphiu Rio-i Waste Collection & Transportation Vehicles sayatsüdang tangokba noksa nung angur.

horticulture, livestock, fisheries, aser organic farming nung terenlok aliba indang lemsatep aser tangbo Northeast nung Nagaland ya coffee timba adokdaksür ama züngshir aser coffee ya Unique Selling Proposition kumogo, ta ashi.

PM-KISAN kübok aluyimer 2.3 lakh dak tema nem sen 686 crore lema agütsüogo, oil palm cultivation ulushir, 'Naga Organic' kübok organic certification agütsür aser organic industry nung shilem tajung agiba asoshi sempet tem nguogo, ta pai ashi.

Ki o jen tsütsü national aser yimdak-yimtsüng lenmangtem tajungba kuma yanglushiba, apu tasen tem yangluba, housing projects aser renewable energy developments indanga pai lemsatepa liasü.

State nung Jal Jeevan Mission kübok yimdak-yimtsüng nung kilen shilem 94 awajemogo aser solar aser hydro power prohjects aser Smart Prepaid Metering ajanga energy access ulushir, ta Nagaland CM-i ashi.

Saisapong tsütsü mezüngbuba Nagaland Super League tenzükogo, indoor stadiums aser futsal grounds tasen yanglua sempet tajung alirtem anitetsü asoshi scholarships agütsür aser national jenjang saisapong nung Nagaland nungi asayar temi medals bener arur, ta ashi.

Tourism kanga tajungba kuma Hornbill Festival 2024 semdangi arur shilem 33 agi timba liasü aser local economy asoshi sen 190 jungnüa ajangzüik, ta pai ashi.

Law and order tsütsü state nung tensa junga lir, aser ibai talisa civil administration police aser security forces tem teka amteper inyakba ajanga lir ta tenüngsang agütsü.

State nung temesepba mozü anema operations balala inyakba nung ita ishika tsüngta sen 80 crore dak tema jenjang narcotics

puogo ta ashi.

Tashi taitba, ajak adenba aser pei sasa pei peria inyaktetba Nagaland akumtsü asoshi külemi inyaktsü nüburtem ajungshiba mapang, "Telungjem aser yimchiyimjung aliba Nagaland akumtsü mangdang asangsang akumtsü asoshi tasü ita, temeim nung bendanga agütsür tejakleni jaja oti," ta Chief Minister Rio-i ashi.

Iba anogo Chief Minister Dr. Rio-i linük nisan salatsü aser Parade Commander S Lanu Aier, Deputy Commandant 10th NAP aser Second-in-command Mhalezhunuo Chielie, Assistant Commandant 8th NAP nati aniba marching contingents 16 nungi salute agia liasü.

Kasa sentong nung pai Swachh Bharat Kosh kübok urban local bodies 20 atema Waste Collection & Transportation Vehicles commission sütsü aser virtual yimya nung Bio Fertilizer Production Units semzüka liasü.

Khiamnuingan, Konyak, Pochury, Sangtam aser Zeliang cultural troupes temi sobaliba ken aser tsüngsang agi shilem agi, 1st NAP Nagaland Police nungi Imna Yaden ajanga ken ana aten aser 13 Assam Rifles Pipe Band display liasü.

NSCN (Yung Aung) aser ULFA (I) ajanga Independence Day mamungtsü ayongzüka liaka Kohima nung aser district ajunga nung iba anogomung sunepa mungogo.

Ajisüaka küm aika tejen reservation policy repringshitsü khanga 5-Tribes Committee on Review of Reservation Policy (CoRRP) ajanga yimjung nung shilem magitsü ayongzüka ajanga Angami, Ao, Lotha, Rengma aser Sumi kin timba aliba district ti nung shilem agir kanga ajema liasü. Item district ti ya Chümoukedima, Dimapur, Kohima, Mokochung, Niuland, Tseminyu, Wokha, aser Zunheboto alitsü.

Nagaland kübok district balala nung 79buba India Independence Day mungogo



DIMAPUR



MOKOKCHUNG

Dimapur, Luroi/August 15 (TYO): Linük ajunga den jangyu medema Nagaland kübok district aser sub-division ajak nung 79buba Indian Independence Day kanga meraketa mungogo.

DIMAPUR:

Dimapur District nung Hokolbarnü 79buba Indian Independence Day ya DDSC Stadium, Dimapur nung kanga takok ngua mungogo. Iba sentong nung Minister for Roads & Bridges, G. Kaito Aye tongti tejaoker liasü aser pai linük wako atsüketja liasü.

Sentong ya Commissioner of Police, Dimapur-i parade asadanga tenzük. March past parade commander ji Imkongsangba Jamir, NPS, Assistant Commissioner of Police (East), Dimapur liasü. Parade contingent tem rongnung Police Commissionerate, Dimapur, 11th NAP (IR) Battalion, Home Guard Civil Defense & SDRF, SEFTI (Forest Guard), aser Ex-Servicemen contingent densema liasü.

Sentong nung NCC, Dimapur Govt. College. Govt. Higher Secondary School, Nagarjan, PM Shri Government High School, Burma Camp, Bethesda Higher Secondary School, aser Zakiesato Memorial Higher Secondary School, Dimapur nungeria shilem agi aser RR Debbarma-i anir 15th Assam Rifles Band Platoon-ia shilem agi.

Sentong nung takok angurtem nem tetushi balala agütsüogo, kong HSLC aser HSSLC tatidang nung topper tem aser saisapong nung takok tajung angurtem densema liasü. Sentong nungsa sobaliba sentong balala saya aser tongti tejaokeri stall tem lapokja liasü.

MOKOKCHUNG:

Mokokchung nung Independence Day ya Imkongmeren Sports Complex, Mokokchung nung mungogo, kong Speaker, Nagaland Legislative Assembly, Sharingain Longkumer-i linük wako atsükettsü aser Independence Day osang bena liasü.

Independence Day Parade Contingent tem ya Parade

Commander ama Tizhisie Pojar, NPS, SDPO (Hq)-i ani aser 2nd in Command ji ABI Tekatemjen SM RHQ, DEF, Mokokchung liasü. Parade Contingent tem rongnung DEF Mokokchung, 2nd NAP Battalion, 13th NAP (IR) Battalion, Home Guards and Civil Defence, Ex - Servicemen, NCC Fazl Ali College, NCC Mayangnokcha GHSS, NCC GHS Dilong, Bharat Scout & Guides Queen Mary HSS, Bharat Scout & Guides Mayangnokcha GHSS, GMS, Bharat Scout & Guides Imrong Ungma aser 2nd NAP Battalion Pipe Band densema liasü.

Sentong nung District Award nisung 9 nem agütsüogo, kong Temsummeren, Dobashi II (District Administration), Opangnenla Jamir, LDA (SP Office), Imsenkala, MTS (Agriculture), John

Ato Kips, LDA/CA (CMO), Lanutoshi, HA (MCTE), Mayangkala Ao, ABSI (SP Office),

Shiluwati, Forester-1 (DFO) aser Taliwati, MTS (District Administration) nung densema liasü.

Sentong nung sobaliba kentenmenü balala sayaba den saisapong balala ayongzüka asayaogo.

ZUNHEBOTO:

Linük ajunga den külemi Zunheboto jila nunga Local Ground nung Independence Day mungogo. Iba sentong nung Advisor, Minority Affairs & Sericulture, Imkongmar tongti tejaoker liasü. Pai parade asadanga aser linük wako atsükettsüba sülen Independence Day osang lemsatepa liasü.

Sentong nung Advisor-i wadang balala nung takok angurtem nem District Awards agüja liasü. Zunheboto nung Parade Commander, Assistant Commandant, Imlisunup Ao-i anir parade contingent aseme shilem agi.

CHUMOUKEDIMA:

Chumoukedima nunga August 15 nü Independence Day sentong ya Sammogooting Stadium nung agiogo. Sentong ya Minister for Environment, Forest & Climate Change and

Village Guards, CL John-i linük wako atsükettsür tenzük aser paisa Rashtriya salute agizükba sülen o jembia liasü.

Parade contingent tem rongnung 1st NAP Bn; 22 nd Assam Rifle; Ex-service man; Patkai Christian College; Mount Mary Higher Sec School; GHSS Chumu; North Town Hr. Sec School; Bharat Scouts & Guides; Pipe Band Shokhuvi nung densema liasü. Parade commander ji Asst Commandant 1st NAP, T. Zubenthung Ovung liasü aser Parade 2nd in Command ji Thepfusalie Angami, ABI liasü.

Sentong nungsa Minister-i Angawadi workers- Joyce Murry, Diphupar; Tiakala Swu, AWC Pimla, Dhansiripar; aser Khesele Sumi, Pherima (B) Medzhiphema nung nem tetushi agütsü. Minister-isa stall balala lapokja liasü.

TUENSANG:

Linük ajunga den jangyu medema Tuensang nunga 79buba Independence Day ya Parade Ground, Tuensang nung mungogo. Sentong nung Advisor for Information & Public Relations, Soil and Water Conservation, Imkong L. Imchen tongti tejaoker liasü.

Parade asadanga sülen tongti tejaokeri linük wako atsükettsü aser Independence Day o jembia aser Parade Contingent 14 nungi Rashtriya Salute agizükba liasü. Tuensang nung Parade Commander ji Asst. Commandant 3rd NAP Tuensang, I. Bunglang Chang liasü.

Sentong nung telok balalai sobaliba ken aser tsüngsang balala saya liasü.

Kasa anogo Advisor-i, I. Chubaonen Director Soil and Water Conservation Department matsüngdang Tuensang aser Noklak District atema Biofertilizer Production Unit Virtually semzükja liasü.

LONGLENG:

Maneni Longleng nunga Independence day sentong ya Public Ground nung agi, kong Advisor, Treasuries and Accounts, Art and Cultural, Konngam Konyak tongti tejaoker liasü.

Konyak-i linük wako atsükettsü aser iba sülen 12 th

NAP IR Chingtok band party-i anir linük naklo ken tena liasü. Paisa, parades contingent tem asadanga aser parade contingent 9 nungi Rashtriya salute agizükba sülen o jembia liasü.

Tongti tejaoker-isa wadang balala nung takok tajung angurtem nem District Awards agüja liasü. Sentong tembangba sülen Advisor-i department balalai lapoker aliba exhibition stall tem semdanga liasü.

NIULAND:

August 15 nü Niuland nung 79buba Independence Day ya Public Ground nung mungogo, kong Minister for Higher Education and Tourism, Government of Nagaland, Temjen Imna Along-i linük wako atsükettsü aser contingent pezü nungi Rashtriya Salute agizükba liasü.

Independence Day o jembiba mapang Along-i, state sorkar takoktem, tetsükdaktsütem aser mapa balala benoka inyaka aliba indang metetdaksü. Minister-isa, department balala indang Exhibition Stalls tem lapokja liasü.

MELURI:

Meluri District nung Hokolbarnü Indian Independence Day ya Meluri jila Local Ground nung mungogo. Iba sentong nung Advisor, Transport and Technical Education,

Temjenmenba alakteta jaoker liasü.

Temjenmenba-i linük wako atsükettsü aser VG, Kukhegwo, NCC, Christian Higher Secondary School Meluri, NCC, St. Xavier Higher Secondary School, Meluri, Christian Higher Sec School

Meluri, St. Xavier Higher Secondary School, S, Pethüry School Meluri, Government Higher

Secondary School Meluri aser Meluri VG Pipe Band ta parade contingent ti nungi Rashtriya Salute agizükba liasü.

Alakteta jaokerisa sorkar department balala aser SHG temi lapokba exhibition stalls tem lapokja liasü.

SHAMATOR:

Shamator district nung Independence Day sentong nung Advisor, Youth Resource and Sports, S. Keoshu Yimchunger tongti tejaoker liasü. Keoshu-i linük wako atsükettsü aser 43rd AR. Shamator Battalion nungi Pipe band-i anir linük naklo ken tena liasü. Iba sülen tongti tejaokeri parade contingent tem asadanga.

Maneni tongti tejaokeri District Commendation Awards aser Progressive Farmers' Award agüja liasü. Paisa, Nasha Mukti Pledge sentong achaayanga agi.

(Maneni tapak 8 nung...)

Jaluki nung local anggo ayok tenzükogo

Dimapur, Luroi/August 15 (TYO): Jalukie Valley Fishery Co-operative Society Ltd-i ayongzüka "Local Fresh Fish Sale" August 15 nü Jalukie Daily Market nung tenzükogo. Iba sentong ya Department of Fisheries & Aquatic Resources Peren-i nongita yaridar.

Sentong tatsüka agiba mapang o jembidang Additional Deputy Commissioner, Jalukie, Albert Ezung-i, aquatic resources sustainably ajungketba aser achaayanga nung cooperative temi tongtibang shilem agi, ta ashi.

Paisa, anggo metsürtem dang anggo tali metsüa angopurtem rongsenketzüng aser lokti libaliro jenjang ajungkettsü ajungshia liasü. ADC-i, parnok

dang fishery resource tem kanga kümdanga amshitsü ajungshiba den angopurtem cooperative society tentetba ajanga teloktemi resources, shishilembaba aser senotsü teyari dak sendakba nung tetsükdaktsütem longjemer kokteta aotsü, ta ashi.

Sentong nung District Fishery Officer, C. Dory Yanthan-i, Valley Fishery Co-operative Society amenokba nükjidong metetdaksü aser ashiba agi, tang atemabo local anggo ya hopta nung Mongolbar aser Hokolbarnü shishilembadak angutsü.

Local Fresh Fish Sale amenokba sentong nung Rev. Kuzerang-i Tsüngrem temaotsü meshizüka sarasademja liasü.



August 15, 2025 nü Bengaluru nung gas cylinder ka apokba ajanga ki chireper aliba noksa nung angur. Iba lendong nung arrshi küm 10 tebur ka asü aser nisung 12 yiru.

South Korea foreign minister Cho Hyun-i India semdanger

New Delhi, August 14 (Agencies): South Korea nung tang tasen shimba foreign affairs minister, Cho Hyun India tonga aruogo; pai August 15 nungi August 17 tashi India semdanger.

Ministry of external affairs (MEA)-i sangdong ka ajanga, South Korean foreign minister Hokolbar aonung New Delhi tonga arutsü aser Honibarnü External affairs minister Dr S Jaishankar ajurua senden amentsü, ta metetdaksü.

India aser South Korea na tsüngda lenla aika nung tesendaktep tajungba akümtsü

nükjidong nung foreign minister-i India semdanger.

India-i Asia nung aliba linüktem, talisa Indo-Pacific region nung aliba linüktem den tesendaktep tajungba akümtsü atema inyakba mapang nung Cho Hyun-i India semdanger.

Cho Hyun ya 2015 küm nungi 2017 küm tashi South Korea ambassador to India lasü, anungji pai India-South Korea tsüngda tesendaktep jenjang kanga junga meteta lir. Tawa Cho Hyun-i Dr. Jaishankar den linük ana tesendaktep tajungba akümtsü

atema jembia lasü.

July 28 nü Jaishankar-i X ajanga South Korea nung foreign minister tasenba Hyun nem tenünsang agüja lasü.

Paisa linük ana tsüngda tesendaktep tajungba akümtsü aser linük ana tsüngda Special Strategic Partnership atema pa den külemi inyaktsü yongyar, ta metetdakja lasü.

Taoba ita Ato kilonser Narendra Modi aser South Korea Tir, Lee Jae Myung na Canada nung ayongzükba G7 Summit mapang ajurutepa jurila senden mena lasü.

RSS-i linük nüchiso atema raraba nung shilem magi: Asaduddin Owaisi

New Delhi, Luroi/August 15 (Agencies): Hokolbarnü All India Majlis-e-Ittehadul Muslimeen (AIMIM) party tongti aser Hyderabad MP, Asaduddin Owaisi-i, kechiba Independence Day anogomong sentong nung Ato kilonser Narendra Modi-i Red Fort nungi Rashtriya Swayamsevak Sangh (RSS) tenüng asanger, ta aitsü.

Owaisi-i, iba ya India nüchiso atema raraba nung RSS-i shilem agia lir ta asütsü merangba lir, ta metetdaksü.

Owaisi-i X ajanga, linük

nüchiso atema raraba nung RSS-i kodanga shilem magi aser parnoki Mahatma Gandhi-a sempaa lasü, ta metetdaksü.

"Independence Day anogomong sentong nung RSS nem tenünsang agütsüba ya linük nüchiso atema raraba asoshi mezüngmeshi lir. RSS aser parnok den kasa tangatetba alirtemi British nung sepaitem ama tenzüka lasü. Nüchiso atema raraba nung parnoki shilem magi aser parnoki British nung anemba dang nungibo Gandhi tesempaba lasü," ta Asaduddin

Owaisi-isa metetdaksü.

Taoba mapang RSS züngsem Nathuram Godse-i Mahatma Gandhi khasetba sülen 1948 küm RSS ya nokdanga lasü. Ajisüaka tesülen RSS lenir MS Golwalkar-i India temzüng kübok alitsü nangzükba sülen iba tenokdangba agien.

Owaisi-i, India atema bendanglen amokmeren tulutibaji China lir saka linük telung nungbo amokmeren tulutibaji RSS lir, kechiyong parnoki "tesempa aser telemsa" proker, ta ashi.

Sorkari sepai ketdangsertem nem award agütsü

New Delhi, August 14 (Agencies): Centre sorkari armed forces nung sepaitem, talisa Operation Sindoor mapang nung shilem agirtem nem awards agütsüogo.

Independence Day jakdang sorkari, Indian Air Force nungi nisung 13 nem Yudh Sewa Medal, nisung 26 nem Vayu

Sena Medal aser Air Force officers pezü den Army officers ana nem Sarvottam Yudha Seva Medal agütsütsü, ta sangdonga lasü.

Taküm April ita nung kiralongrartem Jammu & Kashmir kübok Pahalgam amakba sülen May 7 nü India sepaitemi Operation Sindoor

kübok Pakistan aser Pakistan-occupied Kashmir (PoK) nung kiralongrartem camp 9 amak. Kiralongrartem camp ji Jaish-e-Mohammed, Lashkar-e-Taiba aser Hizbul Mujahideen teloktem indang lasü.

Operation Sindoor ya Army, Navy aser Air Force-i longjemer agiba operation lasü.



August 15, 2025 nü New Delhi nung Independence Day anogomong nung Tir, Droupadi Murmu-i National War Memorial semdanga asürtem nem akhüm a g ü t s ü d a n g tangokba noksa nung angur.

J&K kübok Kishtwar nung tzümetsüng lendong nung asür 65 jungogo

Jammu, Luroi/August 15 (Agencies): Jammu & Kashmir kübok Kishtwar nung tzümetsüng lendong nung asür 65 jungogo aser tanü agi inyakdar, ta Hokolbarnü ketdangsertemi metetdaksü.

Brihostibarnü tzümetsüng ajungben aluba lendong nung Mata Chandi tekülem kidangi temeshi aini aturtem aika asü. Iba lendong atalokba sülen tang tashi nisung noklang aika menguteter aser parnok aika ali agi rembanga alitsü südi ta bilemer.

Tang tashi nung iba lendong nung yirua alir nisung 167 kümzükogo aser iba nungjagi nisung 38 bo kanga mejungi yirua lir.

Tenemlen nungi ajungbena tzümetsüng tulu aluba ajanga temeshi aini aoertem chiyungba langar (community kitchen) aser security outpost ka rembanga lasü.

Hokolbarnü Jammu & Kashmir minister Javed Dar-i, tang tashi nung tasü mang 65 nguogo aser samaba nisung aika mangur, ta metetdaksü.

"Yasüng nungi tenzüka Rescue team aikati kümzükba maparen inyakdar," ta pai metetdaksü.

Ato kilonser Narendra

Modi-ia Jammu & Kashmir Chief Minister Omar Abdullah aser Governor Manoj Sinha na den jembio.

Modi-i X ajanga, "Jammu & Kashmir LG Manoj Sinha aser CM Shri Omar Abdullah na den Kishtwar tensa osang metetpela jembio. Takoksa angurtem yaritsü atema ketdangsertemi inyakdar," ta metetdaksü.

Küm shia agiba Machail Mata Yatra atema tamangertem aika Chositi nung adenshia lasü. BJP lenir Suni Sharma-ibo, iba tesem nungji nisung 1,200 jungnüa lasü, ta metetdaksü.

Iba Yatra atema süki aser dokan aika amenoka lasü. Tenemlen nungi tzümetsüng tulu aluba ajanga sorkar kiojen densema ki 16, tekülem ki asem, water mill pezü, apu metre 30 aser gari aika raksatsüogo.

Iba lendong atalokba nung ajemdaker Kishtwar nung district administration-i Independence Day sentong thinena lasü. Kishtwar Deputy Commissioner-i linük wako asongba aser naklu ken atenba dak alaka tanga sentong kecha magitsü tetuyuba agüja lasü.

Küm shia agiba Yatra ya July 25 nü tenzüka aser September 5 nü tembangsü.



August 15, 2025 nü New Delhi nung 79buba Independence Day sentong nung Ato kilonser, Narendra Modi-i Red Fort nungi jembidang tangokba noksa nung angur.

Government of India Ministry of Health and Family Welfare (Department of Health Research)

Department of Health Research-i temsüa aliba officers dang deputation basis nung Scientist D aser E posts atema application meshir (short-term contract densema). Application agütsütsü atema tatembangbuba anogoji osangkakettem nung iba advertisement sangdongba sülen nungi anogo 45 tashi asütsü. Scientist D aser E posts atema eligibility telatetbatem ama osang tejangjaji Department of Health Research indang website-<https://dhr.gov.in/vacancies> nung angutsü.

A.12025/02/2022-HR
CBC 17301/11/0005/2526

**Sd/-
Under Secretary**

Anava Hospital, Mokokchung nung UROLOGY CAMP alitsü

Visiting Consultant ji:

Dr. J Gnanaraj

(Urologist & General Surgeon)

Anogo : August 22-23, 2025

Contact : 6909534343 / 6909533287

Metetpela nura agüja aliba number ajanga August 21 anogo tashi nung mesüra iba anogo matongdangsa tongtepratepang.

(Poktsütem dak sendakba timtem balala, tezüngjang nung lung aser natzü dak sendakba timtem alirtem asoshi)



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 16, 2025

Naga nunger shibai longjemtsütsü ?

Tang Naga nunger rongdak nungdakbaji yimten nüchiso masü saka Telongjem nungdaker, kechiyong yimten nüjiso yabo alartem nüchi küma külemi longjemmer bushitsüba mapa ka lir. Ajisüaka, Naga nunger yabo nüchia maküm aser telungjema melungjem, anungji yimten nüchiso jenjang ka atongtsübaaji ano len talangka lir. Naga nunger ajak ka küma longjemmer India den memeyoktepi yimten jenjang ka latettsü asoshi 1951 küm May 16 nü bangjem saka ibaji Indiai magizüktet ser Naga nunger reshikangshitsü tenzük, anungji timtem marem Naga nunger tashitemeteteremi anir Naga nunger lushi nungi alinük tilaka longteta India küboksa saka state jenjang nung alitsü atema Nagaland aküm. Atangji, aji agi India nungertemi reshikangshibabo anen saka Naga nunger India kübok mesüi yimten balaka linüba tanela aser tangatetbabo merusep. Aji oda, 1960 küm Naga nunger lenirtemi India government den India telungjem kübok alitsüsa Nagaland state akümstsü jembiba ya kanga shirangba mapang, shirang maremtet 'pain killer' mozüjang ka achir amai liasü, iba jagi maremtettsüsa shirangbabo anen saka tashidakbo manep tang tashi kangshir. Ashiko, Naga nunger ajak atema Nagaland state ya ilara ka longzüka agi asütsüa akok, kechiyong Nagaland nung alir Naga nungertem kija agi Nagaland nung masem mezümekümtepa ochimashi mapa inyaker aser ano takokeribo Nagaland state akümba aitsüli Nagaland state nungi maongka, tajangzük aser teyari agili ta temangmangtsüka lia aoba angur. Ajisüaka, asenoki Naga nunger otsü aser tensa mapang indang metetra, Nagaland state akümbaji aitsütsüa mali aser asangtsüa tuluka madoker, ibajia Naga nunger otsü nung pa mapang nung atalokba tongtibang tatalokba ka liasü. Ajisüaka, tanü Naga nunger yimten nüchiso bushiba maparen nung telok balala aika küma lemsaba den ano tebilemba dena balala akümba ya Naga nunger asoshi yimten nüchiso asoshi India den raraba tebilemtsü dang nungibo tuluba kümogo. Mezüngbo, Naga nunger yimten nüchiso atema British India yimten den jembia aser iba sülen India yimten den jembia aru, ajisüaka tanübo asenok yimten nüchiso jenjang ka latettsü atema British nungertem dena masü aser India yimten dena masü saka asenok o asenok na jembimatsüla akümer, kechiyong tanübo Naga yimten nüchiso bushiba telok ya koba telokar mejangjatetika kümogo. Atangji, Naga nunger nüchiso bushir telok ajaki 1947 küm August 14 nü Naga nüchiso sangdongba anogobo mamadoki yakanüa mungogo, ajisüaka temangmangtsü aser teratatsü kaji, Naga yimten nung tir aser ato kilonser ter dak talii tesem balala nung Naga yimten nüchiso anguba anogomung sentong nung jembibaji asütsü, ibaji Naga nunger atema6 tepelatsü masü saka shisabulutsüka lir. Ano, parnok ajaki jembibaji jungjunga angadagra, parnok ajaki Naga nunger longjemtsü nungdakba indang jembiba angashir. Tetezü, parnokia Naga nunger lungjem nung dang Naga yimten telemtetba kati arutsü ta angateta lir. Aji oda, tangbo India sepaitemi masü saka Naga nunger nüchiso bushir telok balala lemsar alir ajaki longjemner saka telungjemtsür mali ta asüba tebilemtsü ka agi Naga nunger reshikangshidagi. Iba timtem aser nungdakji reprangteta arogo lenirtemi Forum for Naga Reconciliation (FNR) telok tenteta merangdangdagi saka parnoka lenmang aisü nung tetsükdaktsü ajuruba angur. Ajisüaka, arogo lenirtemi ano khen tashi itshir, FNR ama telok ajanga Naga nunger telok paikaya lemsar aliba ya longjemdaktsütsü merangtsübaaji kanga tongtibang nungdak mapa ka asütsü. Atangji, FNR teloki makoktsüka süra, Nagaland nung aliba Naga kintem telungjemtemi danga anir Naga nunger Manipur, Arunachal aser Myanmar nung alirtem a jaoka Naga nunger meputei aliba ya puteptsü aser Naga yimten tebilemtsü ya koktettsü asoshi shisalemsatepa inyaktsü kanga nungdaka kümogo. Atangji, Naga nungertem dang lungjemra, tangbo India den Naga yimten tangatettep kati arutsübo tasak masütsü amai angateter.

OLEMSABANG

Khristan kibong kaji tesendaktep tajung akaba kibong asütsüla

L. Kika Pongener

(Yashi adok nungi...)

Arogo den tesendaktep : Ano Khristan kibong kati tamanger ka ama arogo tsüzüng-özüng aser inyakyim/sentong ajak nung tashi angaa anidaktsüla aser alitsüla. Anema alidangpo tekülem sentepi teti aotsüla, tershilem tenla, tepela tenla, temoatsü tenla ochishia agütsütsüla. Ano arogo sentong ajak nung mulongsoa anidaktsüla, arogo nupotsütsük ajak nung tashi angaa adentsüla aser arogo saru-saji ajak nung tangatetba tajung agi attsüayung mesui mulongsoa agütsütsüla. Yisu alima nung alidang, kenu anogo pa nutsüngtem den Kapernaumi arudang...Tenlaki temelen sarurtem Peter dangi arua ashi..."Nenok tesayur-i tenlaki temelen saru agütsür asü magütsür ? Peter-i ashi agütsür ". Idangji Yisu-i Peter dang asüngdang...Alima chubatem temelen saru shir nungi agir ? Pei chirtem nungi asü bendangertem nungi agir ? Peter-i ashi...bendangertem nungi agir...Yisu ashi...Surabangla, pei chirtembo nuji küma lir...Tetezü, pei chirtembo iba temelen saru agütsütsüji menungdaker....Saka Yisui ashi... "Parnok memettsüdaktsü asoshi na tzüyimi oang, aser borki agi tamasa nai kechi ango mesutetdir, iba ango tebang lapokdang, tatsük/senpak ka mangumer angutsü...Ibaji ni aser na asoshi temelen sarur nemji agüjang" (Mathi-17:24-27). Aji oda, Yisu-ia tenlaki (Synagog) temelen saru tashi angaa agütsüba angur. Anungji Khristan kibong kati arogo mapa ajak nung tashi angaa alitsübaaji...tim mapa ka ta angateter. Asen kibong nung shilo-manem atalokdang sannuker, toklang tenzükertem aser Deacon-temi asen kibong semdanga sarasadem ka agütsübaaji o agi meshitetba Tsüngrem'er temoatsü tulu asütsü. Ano asen kibong nung tasü-tama atalokdang arogoi acha-ayanga Pastor-i 'Asüpila sentep' sentong (Funeral service) agitsütsü. Anungji kong kechi nung lidir liaka, mapang tatsüka dang aliyongjia, teti atema aliyongjia Khristan kibong tajung ka ama arogo den tesendaktep junga alitsüla.

Tsüngrem den tesendaktep : Ajak dang alia, Khristan kibong kaji Tsüngrem den tesendaktep tajung akatsüla. Aji oda, Tsüngrem den tesendaktep tajung maliba kibong ka dang Khristan kibong ta ajatsü makok. Khristan kibong ka Tsüngrem den tesendaktep raksabaji 'Rong' ka tzüyim tiyong nung rongitsü (Rudder) makaba amai asütsü. Sayutsüngir Billy Graham-i ashi.... "Kodang kibong ka nungi Khrista agienadokdir, idangji Khristan kibong tetezüji samaa-adoker". Tsüngrem o-i ashir, "Nisung shia shibai Kibuba tsüngken tsübur; Shibai pa lenmang nung jajar pa temoatsü. Kechiyong ne ket agi züsentetba nai achitsü. Ne kidang kilung nung ne kinungtsüji tejang atangba chinilashi sungdong amai alitsü. Ne chirtem ne langpang meküta olive sungdong ama alitsü. Kibuba tsüngken tsübuba nisungji yamaji alitsü" (T.Ken-128:1-4). Yisu-i ashi, "Kü dak liang aser ni nenok dak lidi; tezü dak melira kechi koda kongsangi tejang metangtet; yamaji kü dak melira; nenok-ia tejang metangtet. Shiba kü dak lir aser ni shiba dak lir; iba jagi tejang jenti atanger; kechiaser ni nungi pila-a nenoki kecha meinyaktet" (Yohan-15:4-5). Yisu Khrista dak tangloka aliba kibongji tejang jenti tangdaktsütsü....Jala jabaso tajung moatsütsü, alima nung taküm chiyungtsü aser alima rongsena moatsütsü. Tsüngrem den tesendaktep tajung akaba kibongji yamaji moatsütsü. Nisung ka alima nem tajangzük agütsüba aser alima asoshi tagidak akaba nubu ka küma yanglutettsübaaji kibong ka nung yanglur. Nisung ka kodaki aotsüba aser molumi-i aotsüba taküm ka küma renemtetdaktsübaaji kibong ka nung renemtsür. Anungji kibong ya nisung taküm ka yanglushidak 'Yinsem' ta ashitsü akok. Yintsünger kati yinsem nung nungdakba osettsüset kechisarena ajak atsüngba ama, kibong ka nungjagi Scientist, Doctor, Professor, Lawyer, Engineer, Teacher, IAS, IPS, IFS, NCS etc. yamala lennir tajung adokdaktsür. Ajisuaka, Tsüngrem den tesendaktep raksaba kibongtem nungibo ashi-auer, rakzükrakdemer, ashi-külaker, kiralongrar, tetsür taküm raksatsür, nisung tepseter, nisung pua bener aor, yimden, arogo aser loktiliba menentsür, iba amala nisung adokdaktsür. Anungji kibong ya Tsüngrem den tesendaktep tajung akaba kibong ka küma yanglutettsü kangasa tongtipang lir.

Anungji tsürabur ajaki kibong ya mesentoktsüla. Kibong nung tsüraburtemi pei chirnurtem mapang shidak nung tazüoktsü tim mazüoki züba-züba-a toktsüra, iba kibongji aiatai kibong ka akümstsü aser raksar külenbo yanglushitsü tasak asütsü aser kangasa sasatsü. Tsüngrem o-i ashir...."Tanür ka pa aotsüba lenmang nungji sayutetang; aser pai tain akümdang iba nungi mepilatsü" (A.Shin-22:6). Kibong ya chirnurtem shisatsü angazükdak riju tulutiba lir. Kibong ya nisung ka kodaki aotsüsa taküm aser tanela renemtsüdak kimong lir. Kibong ka jungra yimden, arogo aser loktiliba ajak ajungtsü. Kibong aika nung kinungbu o kinungtsü na prongla rongsen bushidang chirnur kong koda alir (?) Memeteti senzüka yutsüba agi taküm raksadaktsüba angur. Aji oda, rongsenbo aika bendena yutsü, ki tajung aika yanglua yutsü aser kimong-lumong aika alia yutsü....Saka item rongsen ajakji chirnur kar mozü-lar, kar yi-lar aser kar nuktapangdar/japojarir kümer tsüraburi bendena yutsüba rongsen ajak anak-aoyi kümdaktsüba kibong karbo lir. Anungji tsürabur ajaki angatettsübaaji.... Rongsen ajak dang tulutibaji chirnur tajung kümdaktsübaaji lir.... Anungji kibongji mesentoktsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Amplify Fest 2025 nung nisung 1,200-i Khrista agizük



Amplify Fest 2025 nung adenertem noksa nung angur.

August 15, 2025: Benton, Arkansas nung ayongzükba Amplify Fest 2025 outreach nung state 37 nungi nisung 45,000 aden aser nisung 1,200-i Khrista agizük.

Pulse Evangelism-i ayongzükba anogo ananü sentong ya linük nung küm shia ayongzuka agiba evangelistic outreach aser training sentong tulutiba lir.

August 8-9 anogotem nung agiba sentong nung osangtajung ken aika atenba den evangelism training agia liasü aser taküm kuli lemsatepa liasü.

Osangtajung kentenertem-Maverick City Music, Lecrae, Switchfoot, Matthew West, Christy Gayle, TRU-SERVA, Gio, Terrian aser Jamie MacDonald nungeri shilem agi. Iba sentong nung America's Got Talent takok angur, Dustin Tavella-ia shilem agia liasü.

Pulse Evangelism

tentetsang aser Tir, Nick Hall-i aonung anaprong tongti sentong nungji osangtajung kakettem nung ajemdaker sayutsüngia liasü. Iba dak alia Pulse training program nungi lanur 16-ia jembia liasü.

Iba sentong nung nisung 1,226-i Khrista nem taküm bendanga agütsü. Parnok rongnung karbo tang mezüng Khrista agizükertem liasü aser kar tanaben bendanga agütsürtem liasü.

Ano sentong tiyongtsü nung evangelism training nung adener nisung 20,000 liasü.

Nick Hall-i, "Yisu tenüng ajungkettsütsü atema asenok yangi adenshi. Tsüngremi inyakbaji asenoki meshiba mesüra imlaba dang nungi khenyongi balaka lir. Nisung meyrjang aikati Khrista osangtajung angashiogo aser aika taküm melenshiogo," ta metetdaksü.

Saline County, Arogotem,

tenla agütsürtem aser security sepaitem densema volunteers 700 ajanga iba sentong takok ngua agiogo.

"Arkansas nung Tsüngremi mapa inyak tenzüker. Iba sentong takok angutsüsa lenmang balala ajanga yarirtem dang onoki pelar. Khrista osangtajung angashirtem Yisu temeim ajanga teti asoshi taküm melenshitsü onoki sarasademtsür," ta Hall-i metetdaksü.

Amplify 2025 ya hopta ka sentong dang masü saka küm piyong agiba sentong ka lir. Amplify 365 kübok ministry-i linük tesem ajaklen Khrista osangtajung lemsateptsü atema training agütsür.

Kentenmenü, training aser Khrista tiyongtsü südaktsüba sentongtem ajanga t a m a n g e r t e m longjemdaksütsü nükjidong nung 2012 küm Amplify ya tenteta liasü.

Nigeria nung court kati Owo nung Tenla ki amakba ken o angadangtsü

August 15, 2025: 2022 küm Southwestern Nigeria kübok Owo nung bomb aser prangpong amshia Tenla ki amakba ken o nung nisung pongu nem tai tonglokja lir.

Iba tatalokba nung Khristan 50 dak tali asü.

Hombarnü Abuja nung aliba federal high court nung Judge Emeka Nwite-i iba ken o angadangogo aser maneni August 19 nungi tenzüka ken o angadangtsü.

Ketdangsertemi ashiba agi, bomb amshia Tenla ki amakba tatalokba nung melung melemteti alirtemji East African group al-Shabab den sendaktepa alitsüa akok.

Owo ya Boko Haram aser Islamic State West Africa Province (ISWAP)-i timtem agütsüba region kübok masü,

ajisüaka Tenla ki amakba ken o nung ISWAP dak-a melung malemer.

Tenük kuli alirtemi ashiba agi, anüngdang tekülem sentong tembangtsü mapang anasa telok ka aruba sülen Tenla kima arrshi küm 15 tebur ka tama khaseta liasü.

Tenük kuli alirtemi karibo, prangpong bena alirtemji Fulani Muslim nungertem asütsüa akok, ta metetdaksü.

Tamalen Owo nung Khristan lenirtemi, Owo anasa arem nung Fulani züngsemtem lir aser parnoki alu raksatsüba den tetsürtem anema inyaker, ta metetdakja liasü.

Nigeria nung Ondo state kübok Owo jila nung aliba St. Francis Xavier Tenla kidang June 5, 2022 nü Pentecost

Sunday tekülem sentong tagidak mapang nung prangpong amertemi Khristantem amak.

Tenla ki telung nung nisung aika khaseter aliba video aser noksa balala twitter ajanga prokshia liasü; asürtem rongnung tanurtema aika densema liasü.

Meimchir temeden atema inyaker aser Hudson Institute nung religious freedom tsütsü mongin, Nina Shea-i, "Nigeria nung Khristantem amakba kanga bulua kümdar. Tenla ki sünga amangbapurtem adenshir tekülem sentong agiba mapang nung amakba ya tesüiba küm aika northern Nigeria nung kanga bulua ataloker. Iba ya Islamist kiralongrartem mapa lir," ta metetdakja liasü.

ANO GO ABEN TSÜNGREM DEN

Ozü kibongibo

*Ni aser ozü kibongibo Kihuba tenzüksü.
(Yihu.24:15)*

Yihusuar kibong nung süngyanglu tsüngremtem benloktsü atidangba aika dang liasü, aser itemji benloktsü koka dang liasü, saka pai Kibuba Tsüngrem par kibong nung anioktsü aser tenzüksü ang shimtet.

Pa army general ka, yimsüsür ka liasü. Nüburtemi pa telemtetba angashir nubur ajaki Yihusuai tenzüka Tsüngremsa tenzüksü nangzük. Kin aser kibong nung Tsüngrem meteta alitsübaji yimsüsür aser kibong nung tekolak telemtetba dak keta lir. Yimsüsürtemi Yihusuai ayimoktsüba ama "Ni aser ozu kibongibo Kibubasa tenzüksü; nenoka shiba tenzüksü shimtetang" ta ashiba ama tanu yimsüsür shibai aser shir kibongi shitettsü?

Nai ne mulungjang ajunga agi Kibuba meima Pa tenzüksü shimtetra ne nubur aser ner kibongi ne tsüngnep nung anidaktsü. Yimsüsür aser kibong nung tekolakji kin aser kibong asoshi tatishitsü aketba taküm ka asütsüla. Yihusuai ama tarendak makai Kibuba tenzüksü shimtetra Kibubai ne kin aser kibong moatsütsü!

Alaska nung Orthodox Khristan-temi yimjung atema sarasadem

August 15, 2025: Russian Orthodox Hokolbarnü Alaska nung US missionary temi Aso 18 aser Tir, Donald Trump aser Russia 19buba mapang nung Alaska-i Khrista osangtajung bener oa liasü.

Orthodox Khristantemi anogo Alaska nung Orthodox asemnü tashi Ukraine nung Khristantemi Mongolbar nungi yimjung atema sarasademogo.

Orthodox ya Russia aser nung yimjung atema Ukraine naprongla nung sarasademtsüogo. nütsüng teimba aliba yimsü lir. Mongolbar sarasadem sentong nung Lorinda Fortuin-i, "Ukraine aser Russian Orthodox adianutem tsüngda tepsettepba agi ni melung raksar, kechi atema tepsetteper. Iba ya taaktsüka lir. Iba lima nung yimjung atema ni kechi inyaktettsüar inyaktsü. Ni amanger, kü sarasadem ajanga iba nungi shilem agitettsü," ta metetdakja liasü.

Sitka & Alaska Diocese nung Archbishop, Alexie-i, "Lenirtem Alaska-i arutsü lir, anungji Arogoi kechi inyaktettsü? Yimjung atema sarasademtsütsü akok," ta metetdakja liasü.

Vietnam nung Khristantem tekülem sentong tagidak mapang apu

August 15, 2025: August 11, Iba tatalokba mapang nung 2025 nü Vietnam nung Dai Tu tamangertem kari social media, district kübok Binh Khang nung talisa Facebook ajanga putir ka leniba nung ki ka nung Khristantem apuba video ji livestream süa liasü.

Iba video ji Bac Ninh Diocese indang Facebook page nung upload asüba sülen ghonda ana tsüngda video ji noklang aiben share asü aser views 60,000 dak tali liasü.

Kidangji Khristan 20 shi Tang tashi nungbo tekülem sentong agia liasü ketdangsertemi Khristantem ajisüaka parnoki nisung asem tekülem sentong tagidak dang puer ao- ki kibur, Khristan mapang timtem agütsüba aser lenir aser Arogo nung züngsem Khristan asem puer aoba kuliji ka puer ao. memetetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Teshirep

(adj) taküm ka tasü küma ilarep (rotten)


* Arem nung onoki shiruru temang teshirep ka angü.

Teshisa

(v) sü mesüra kaket raksaba (torn)

* Train anendak tula teshisa semer meshimetsür ka liasü.

OLONG PAITEP # 7241



TIPIEN :

1. Lapok / Tenzük - (4)
6. Tarutsü indang tetzü - (4)
7. Yimer ajak - (7)
9. Ishika dang - (4)
11. Terongtong aser tepi
tetsünga - (7)
12. T _ _ _ i - (4)
15. Tsürabur nungi lemsükba
- (7)
17. Tetsür tanur dang ajaba
- (4)
18. Shirang ajung - (4)

LANGTSÜNGLEN :

2. Pei tasoli - (3)
3. Iba anogo - (4)
4. Telemsa ka - (6)
5. Maneni - (3)
7. Tekaratiba nung - (5)
8. Ki temalen - (5)
9. Temejung - (5)
10. Teimla aka - (5)
11. Tajatsü - (6)
13. Molung - (4)
14. Anogo semer ka - (3)
16. Tashi balaka - (3)

OLONG PAITEP # 7240 TELANGZÜBA


TIPIEN :

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüksü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER MA



Nisung shirnok taküm nung kanga dang azüngmeyaka (loneliness) alir, parnok dak tama temulungjang tashidak agi atonger.

Manipur nung yimjung tanem tanemi arudar: Angh Bhalla


Imphal, Luroi/August 15
(Agencies): 79buba

Independence Day amungba anogo Manipur Angh Ajay Kumar Bhalla-i, sorkar, armed force aser lokti tentet balala longiemer inyakba ajanga state nung yimjung tanem tanemi arudar, ta ashi.

Imphal kübok First Manipur Rifles parade ground nung linük wako atsüketba mapang Angh Bhalla-i, yimjung bener arutsü aser shinga sentoka metoktsüi terenlok maparen balala ajungkettsü atema Manipur-i, centre sorkar aser nüburtem den sendaktepa inyakdar, ta ashi.

Pai nüburtem aser talisa lanurtem dang yimjiyimjung nung aliba aser tangar dak metaloker maliba state ka yangertsü atema maneni bendanga agütsüshitsü ayongzüka liasü.

Angh Bhalla aser First Lady



Jyoti Bhalla nati Har Ghar Tiranga nung shilem ka ama Raj Bhavan, Imphal nunga linük wako atsüketa liasü.

Parnoki, India nüjiso atema raratem nem tetushi agütsü aser linük telongjem aser terenlok asoshi tali bendanga agütsüshia liasü.

X nung post ka ajanga Angh-i, Manipur nung alirtem aser lisopurtem den salem lemsatep aser India nüjiso atema raraba mapang pei taküm bendanga agütsürtem nem tetushi agüja liasü.

Paisa, state nung kin o kin tsünga mangatettep adokba ajanga nisung taküm samaba aser aika pei talidak ki toktsür jenshia aotsüsa akümba indang lemsatep. Angh-i, mepetmesü bentettsü aser state-i yimjung bener arutsü atema jenjang tapet agidar, ta ashi.

Angh Bhalla-iashiba agi, Independence Day ya nüjiso anguba benjungba ka dang masü saka iba ya India nüjiso atema pei taküm bendanga agüja tasü ita raratem belemtetba mapang ka lir.

Assam CM-i 'love jihad,' 'land jihad,' anema rara ayongzüc



Guwahati, Luroi/August 15
(Agencies): Assam Chief Minister Himanta Biswa Sarma-i Hokolbarnü ashiba agi, "asenoki rara tulu ka raraago aser maneni raratsü."

Guwahati kübok Khanapara nung 79buba Independence Day sentong nung o jembiba mapang Sarma-i iba rara nükjidong lemsatepa liasü.

"Iba rara ya 'love jihad,' 'land jihad,' iba ya ozünga alema state-i arua alirtem anema lir," ta paisa shisem.

Maneni pai lisopurtem dang

Assam ali aser senmang kümzüka ayutsü ayongzüka den, "Assam nungertemi tribal tem ali, grassland, sorkar ali aser arem ali ajak mazüngtet tashi animesüngzüksü ta nangzüko," ta pai ashi.

Assam sorkari küm ishika tsünga ozünga alema atsünger aliba ali acre meyrejang aika meyipa agiogo. Ketdangsürtemi ashiba agi, 2021 küm nungi tang tashi nung ali acre 25,000 dak tema meyipa agiogo.

Sorkar record ajanga districts 11 nung ali bigha

15,288.52 ozünga alema atsünger aliba sayuogo. State-isa, Barpeta, Nagaon, Bajali, aser Lakhimpur nung institution 922 nungi ali acre 4,400 meyipa agütsü tenangzüka agütsüogo.

Heritage site tem kümzüka ayutsü atema Assam Land and Revenue Regulation (Second Amendment) Bill, 2024-i satras telongtet km 5 nung bendangertem nem ali malidaktsütsü atema tenokdangba agütsür lir. Kasa mapang nung Basundhara 3.0-i, mapping, zoning aser tawa yangluba Satra Aayog mapa benoka inyakdar.

2025 küm July tatemlen Uriamghat nung ali bigha 3,000 azüngtettsüogo aser ki 278 raksatsüba den kozü alu ka azüngtetja liasü. Sorkari ashiba agi, taruba itatem nunga iba inyakyim ya maneni benoka inyaktsü.

Maneni Sarma-i lisopurtem dang bendanger dang ali mayoktsü mepeshia metetdaksüogo.

THRC-i GDMO recruitment ken o ashishi

Agartala, Luroi/August 15
(Agencies): Tripura Human Rights Commission (THRC)-i, state nung tawa General Duty Medical Officers (GDMOs) shimba süoki ia bilemba lemsatepogo. Candidate tem aikati iba tatidang nung marks 100 nungi 30 dak tekübokba angü ta osang agütsüba sülen parnok iba tebilemtsü ya lemsatepa liasü.

Media-i iba osang agütsüba dak ajemdaker Commission-i, Director of Health Services aser Tripura Public Service

Commission (TPSC) dang telangzüba ka meshiogo. Iba tatidang ya TPSC-i achaayanga agi aser 2024 küm July ita candidate 216 recommend süa liasü.

Osang ajanga ashiba agi, candidate tem karibo marks 14, 19 aser 21 dena ngua liasü aser iba ajanga parnok yagi kechi amala medical service tem agütsütsü ta tasüngdangba adoker.

Commission-i, iba amala nisungtem shimba ajanga public healthcare jenjang mejungi

kümdaktsütsü, aser iba ya Constitution kübok Article 21 nung fundamental right to health agüja aliba anema asütsü ta tekümdangtsü metetdaksüogo.

Maneni THRC-i, marks 30 aser iba dak tekübok angurtem osang tejangja ka magütsü tashi meshimi atatsü shidangogo. Ken o dak sendaka aliba ketdangsürtem dang anogo 10 tsünga telangzüka agütsütsü metetdaksüogo aser ken o ya maneni August 26 nü asadangshitsü.

Ajungben tzümtsüing agi Pakistan nung nisung 56 asü



Peshawar, Luroi/August 15 (Agencies): Hokulbarnep ajungben tzüinglu kanga sashia aruba ajanga Pakistan northwest tsütsü Buner nung tzümtsüing adoka nisung 56 asü ta sorkar ketdangsür kati ashi.

Northwestern Khyber Pakhtunkhwa province kübok Buner district nung yimtsüing balala nung tzümtsüing tesashi agi nisung aliba ki aika raksatsüba nung nisung aika yiru, ta Kashif Qayyum-i ashi. Tzümtsüing agi taolen makai aliba nisungtem kumzüksü asoshi rong aser helicopters tem amshir.

Yimtsüingtem nung nisung aika samar bushiteptar, aser iba tsümetzüing lendong nung asürtem timba akumtsü, ta pai ashi.

Hokulbarnep asüba ya Pakistan tesem balala nung tesüiba ghonda 24 tsüingta

tzüinglu dak sendakba lendong nung nisung 60 asürtem rongnung maden.

Tesem tila nung ajungbena tzüinglu kanga sashia aruba dang 'cloudburst' ta ajar aser ibai India indang Himalaya region aser Pakistan northern tsütsü kanga bulua ataloker, kong ajungben tzümtsüing aser alinen alutsü tesem agi sünga lir. Ajungben iba ama tzüinglu kanga sashia aruba ajanga tzümtsüing aser alinen aludaksür aser tenem nung aliba nisungtem dak kanga kongshir.

Tesüiba ghonda 24 tsüingta Pakistan northern aser northwestern tsütsü ajungben tzümtsüing ajanga nisung 60 shi takum samatsü aser alinen agi kongshir aliba district ka nung taolen makai aliba tourist 1,300 kumzükogo. Item tesemtem nung nisung 35 samar

bushir ta yangji aliba ketdangsür temi ashir.

Pakistan tesem balala nung June 26 nungi tenzüka tzüinglu dak sendakba lendong balala nung tetsür aser tanur timba sür nisung 360 dak tema takum samaogo.

Brehostibarnü Mansehra district kübok Siran Valley nung ajungben tzümtsüing alua alinen aluba ajanga taolen lenmang ajunga shibanger aliba tourist 1,300 kumzüksü asoshi rescuer temi ghonda aika inyaka liasü, ta Khyber Pakhtunkhwa nung provincial emergency service odongtar Bilal Faizi-i ashi.

July ita nungi Pakistan nung Gilgit-Baltistan region nunga tzümtsüing aiben alua Karakoram Highway nung alinen alua liasü, koba Pakistan aser China sendaktepba tongtipang lenmang ka lir.

Alaska senden sülen kecha nunga meyongnem magütsütsü: Kremlin



Dmitry Peskov

Moscow, Luroi/August 15 (Agencies): Alaska nung Russia Tir Vladimir Putin aser US Tir Donald Trump semdem amenba sülen document kecha nunga meyongnem agütsütsü meimlar, ta Kremlin odongtar Dmitry Peskov-i Hokulbarnü ashi.

Iba senden ya mapang tatsüka tsüingta ayongzüik aser kechi telemtetba agitsüar meshitet ta pai ashi.

Lenir ana tsüingta ken o tasaktiba indang jembitsü, ta Peskov-i ashi. Agreements yanglutsü meimlar, ajisüaka iba

ya ajanga tesem kar nung angatetteptsü aser tarutsü nung tesendaktep atema lenmang yanglutsü akok, ta pai ashi.

Russian Foreign Minister Sergey Lavrov-ia iba senden nung telemtetba agitsüba indang takzüba magizük aser Moscow-i bilemba lemsatepba nung masü saka asangsang nung rangloker ta shia liasü.

Trump indang envoy Steve Witkoff-i tawa semdangba mapang iba senden atema maparen tenzüka liasü aser maneni sensaksemtsü imlar, ta Lavrov-i Alaska tonga aruba

sülen ashi.

Hokulbarnü Alaska nung Putin aser Trump senden amentsü aliba ya alima nung yimten tesendaksü atema tongtipang ka ama züingshir, koba ajanga Ukraine nung rara aser European security indang tarutsü tia yanglushitsü imlar.

Trump asoshi iba senden ya pa sasa ken o jembir aser yimjung yanglur takotet ta sangdongba sayutsü asoshi maongka lir. Pai iba rara kera tembangtetsü ta pa aser par allies temi jembia arur, aser tang ibaji tendangtsü.

Putin asoshi America nunger li nung US tir den indang-indanga jembishinü akatsü maongka iba amai aiben majurutsü. Moscow-i litsü ajangzüiktsü, NATO nung Ukraine züngsem akumtsü tejangraba nokdangtsü teimla lir.

Iba senden nung Ukraine Tir Volodymyr Zelenskyy mejaok. Hokulbarnü jembishinüba junga ora, Zelenskyy densema senden tanabuba amentsü tasa Trump-i lemsatep, saka Kremlin-i iba ama senden amentsü memulunger.

MENUNGRA BILEMTETER

Asür Ojala Nungshitula (Longjang)
1st Death Anniversary (16th August 2024)



Onoki teti meima aliba Oja,
Na iba akumlrir wadang temer meyipa meshilangba limai orr tanü küm ka ajunger. Na onok den meliaka nü temeim tamang aser sarasadem onok mulungjang nung teti lir. Nü mapa tajungtem nüklai arudang, onok temulung anisüingzüik angur.
Shia aruba Kibubar anogo nung asenok pela ajurutsü yimlar.

Temeim Chirnurtem, Semchirtem aser Kinungertem.

Trump-i maneni India-Pakistan ceasefire tenüing agir



Washington, Luroi/August 15 (Agencies): US Tir Donald Trump-i Brehostibarnüa (par mapang) Operation Sindoor mapang India aser Pakistan tsüingta ceasefire yanglutsü ta tenüing maneni agia tayimtsü 6-7 khazüka yok ta ashi, saka shir tsütsü akoksar tajangja mashi.

"Tesüiba ita trok nung ni rara trok bentettsüogo. Aser iba atema ni tejak tenteter. Pakistan aser India dak ranglokra, anünglen nungi tayimtsü trok mesüra tenet khazüka yok. Parnok nuclear amshitsü renema liasü, ni aji bentettsü," ta pai Oval Office nungi ashi.

Pahalgam nung kiralongrari amakba sülen Operation Sindoor nung Indian Armed Forces temi Pakistan aser Pakistan-occupied Kashmir (PoK) nung kiralongrar indang ki o jen amakba sülen Islamabad-i tashiyim amshiba nung New Delhi-i telangzüba agüja India aser Pakistan tsüingta tsükchitep tenzüka aliba pai anendaksü ta Trump-i shijen shia arur.

Ajisüaka Operation Sindoor sülen dangar shingaia shilem magi ta India-i shijen ashir, kong April 22 nü Pahalgam nung kiralongrar temi amakba langzüa Pakistan aser Pakistan-occupied Kashmir nung aliba kiralongrar camp toku nung India sepaitemi amak.

Tawa Lok Sabha nung jembidang India Ato Kilonser Narendra Modi-i Pakistan anema inyakba anentsü India dang shingaia masüingdang ta jangja-jangja ashi aser Pakistan

DGMO ajanga ceasefire atema asüingdang ta ashi. India-i nükjidong noklang shilem tongtetba sülen rara anentsü telemtetba agi, ta Modi-i ashi.

India-i Russia nunger totzü aliba mechi Trump-i India nungi bener aruba oset ajunga nung tariff shilem 50 meshia India aser US tsüingta mangatettep adok, aser kasa mapang Washington ya Pakistan tsütsü tejak meyiper ama kuma lir, aser rara anendaksüba asoshia US tir tenüing asang aser Nobel Peace Prize asoshia nominate süogo.

Kasa mapang Trump-i Hokulbarnü Alaska nung Russia Tir Vladimir Putin ajurutsü aliba dak sendakba nung Russia aser Ukraine tsüingta ceasefire alitsü teimla ka sayu. Ajisüaka ceasefire ya tang tenzüksü asoshibo pai meshitetsü ta ashi saka yimjung tezüngzüktep ka tetsüingtai ia yanglutsü tejangraba lemsatepa liasü.

"Asüing Tir Putin den senden ka amentsü. Iba senden ya tajung asütsü ta ni amanger, aser Tir Putin-i yimjung yanglutsü ta ni amanger. (Ukraine) Tir (Volodymyr) Zelenskyy-i yimjung yanglutsü ta amanger. Parnok tangatettep kati arutettsü asü masüar reprangdangtsü. Aser parnoki inyaktetra, aji kanga tajung asütsü," ta pai ashi.

"Senden tajung asütsü asü tamajung asütsüar ashitsü makok. Senden tamajung süra kanga kera tembangtsü. Aser senden tajung süra, tarutsü nung yimjung alitsü asoshi jembiyonga aotsü."

Mon team-i T Ao Trophy - Inter District Football Trophy 2025 kokogo



Kohima, Luroi/August 15 (TYO): Hokolbarnü 24buba Dr T Ao Trophy - Inter District Football asayamung final nung Mon team-i Niuland team koka iba asayamung kokogo. Iba asayamung ya Nagaland Football Association-i ayongzüik aser Kohima District Planning and Development Board-i host süa Indira Gandhi Stadium Kohima nung asayaogo.

Final nung Chief Minister Neiphiu Rio aser Deputy Chief Minister T R Zeliang nata

densema lia asayaba mapang Mon-i penalty metsütepba sülen goal 5-4 agi Niuland koka liasü. Atakzüksür aliba minute 90 aser mapang apuloktsür asayaba mapang tashi nunga team anapronglai goal 1-1 dang idaktsüba sülen penalty metsütepa liasü.

Asaya nung mezüngbuba goal ya Niuland team atema captain Kakhevi Assumi-i idaktsü. Asaya tenzüker minute 12buba nung Mon defence-i D'box telung nung Thulunso alangdaksüba sülen referee-i

penalty metsütsü maongka agütsü, koba Kakhevi-i aibelen mesüi idakja liasü.

Ajisüaka defence-i ball agütsüba ka goal-keeper Homuka-i pua aruba sülen referee-i Mon team nem indirect free-kick metsütsü atema maongka agütsü, koba minute 45buba nung K Arap-i idakja liasü.

Asaya tanabuba shilem nung aser mapang apuloktsür asayaba mapang tashi nunga team kati danga goal talila midaktsütetba sülen penalty

metsüteptsüsa aküm.

Penalty metsütep danga team anapronglai goal 4-4 idaktsü saka sudden death asayaba mapang goal-keeper Teihom Konyak-i Niuland nunger asayar kati metsüba ball nokdang aser Mon team nungi asayar trokbubai metsüba ball aibelen mesüi ia parnoki asaya akok.

Iba asayamung akokba sülen Mon team nem Chief Minister Neiphiu Rio-i lakh ana agütsüba densema sen lakh 5 aser runner-up Niuland nem CM-i lakh ka agütsüba densema sen lakh 3

agütsüogo.

Jurila sempet angurtem nem senpet sen 1000 den takok marok agütsüogo.

Jurila sempet angurtem:
Best defender: Thejangulie Zatsu; Kohima
Best Midfielder: Sentilong; Mokokchung
Golden Glove: Teihom Konyak; Mon
Golden Boot: Ayenmongba; Tuensang
Player of the Tournament (Golden ball): sen 15000 aser trophy: Kakhevi Assumi; Niuland.

Suthozumi All Nagaland Online Open Chess asayamung tembangogo

Kohima, Luroi/August 15 (Agencies): Suthozumi Chess Association-i ayongzüka Hokolbarnü 1buba Suthozumi All Nagaland Online Open Chess Tournament asayaogo.

Iba asayamung ya Nagaland Chess Association tawabangba kübok kanga takok ngua asayaogo.

Asayamung Open category nung champion ji Kevilekho Zumvu liasü, pai point 11.5 ngua takok nguogo. Kasa category nung Mughaho Awomi aser Khoveto Vero na tanabuba aser tasembuba jenjang nung liasü.

Iba category nung top 20 asayartem nem sempet agütsüogo.

Under-17 section nung

Vibeto Assumi temaba jenjang nung liasü aser pa sülen Icacang Haikam aser Setsuzo Phesao na tanabuba aser tasembuba jenjang nung liasü.

Kasa mapang nung Ilung Haikam-i Under-11 category asaya akok aser pa sülen Otsi Tunyi tanabuba aser Reku Haikum tasembuba nung asaya tembanga liasü.

Tsesam-i asayamung nung kanga junga shilem agiba atema la nem best female player naroküm agüja liasü.

Iba asayamung nung state kübok tesem balala nungi asayartem aikati shilem agiogo, kong taoba mapang aser tang state aser national asayartem densema lir.

BENDANGLI OSANG :

Tapak 2 nungi...

Nagaland kübok district balala...

NOKLAK:
Noklak nung Minister, Housing & Mechanical Engineering, P. Bashangmongba Chang-i linük wako atsükettsü aser parade contingent tem nungi Rashtriya Salute agizüka liasü. Parade contingent tem rongnung DEF & NAP, NVG (lengnyu), NVG (Phoklagan), GHS Noklak Village, GHSS, Christian High School Noklak, Holy Angel School, St. Paul School aser Frontier Piper Band (NVG) nunger densema liasü.

PHEK:
Minister for Public Health Engineering & Cooperation, N. Jacob Zhimomi-i, August 15 nü Local Ground, Phek nung Independence Day sentong maotsüogo. Zhimomi-i linük wako atsükettsü aser Parade Contingents 19 nungi salute agizüka liasü. Sentong nung Khuza Cultural Troupe-i sobaliba tsüngsang ka saya aser Music Ensemble Phek aser Assam Rifles Public School, Phek nungeria shilem agia liasü.

MON:
Mon nung 79buba Indian Independence Day, Local Ground nung mungogo. Iba sentong nung MLA & Advisor for Water Resources, Tongpang Ozukum alakteta jaoker liasü.

WOKHA:
Tanga district tem den külemi Wokha nunga Independence Day sentong Public Ground nung agiogo. Iba sentong nung Minister for Women Resource Development and Horticulture, Salhoutuonuo Kruse tongti tejaoker liasü. Sentong nung Minister-i linük wako atsükettsü aser Rashtriya Salute agizüka liasü.

KIPHIRE:
Kiphire Independence Day sentong nung Deputy Chief

PEREN:
Peren nung Independence Day sentong ya Deputy Commissioner's Office Complex nung agiogo, kong Nagaland Legislative Assembly Deputy Speaker, S. Toiho Yeptho alakteta jaoker liasü. Yeptho-i linük wako atsükettsü aser parade asadangba den Independence Day osang aben. Deputy Speaker-isa District Commendation Awards aser ATMA Best Farmer Awards agüja liasü.

TSEMINYU:
Tseminyu District Independence Day sentong nung Advisor, Urban Development and Municipal Affairs, Zhaleo Rio alakteta jaoker liasü. Pai linük wako atsükettsü aser Rashtriya salute agizüka liasü. Paisa, parade contingents tem asadang kong 4 th NAP Tseminyu aser Ex-servicemen contingent densema liasü.

Maneni alakteta jaokeri
District level Nasha Mukta Bharat Abhiyan committee district Commendation Award agütsü aser department balalai lapokba exhibition stall tem semzüka liasü.

BENDANGLI OSANG :

Tapak 1 nungi...

Chennai nung Nagaland Angh...

Asür Ganesan ya February 11, 2023 nü Nagaland indang Angh 21 buba shim aser bendanga agütsür state tenzüka liasü. Pai Nagaland nung telungjem alitsüba tesendaktep tashi itshitsü aser terenlok maparen asoshi anibelem mesasai inyaka liasü, ta Nagaland CM-i ashi.

State nung tematiba Office amer liaka, pa kanga tongmelang, ajemalu aser nüburtem den kanga junga sendaktepa liasü. Pa dak yimya tajung aliba yong nüburtemi pa saklok aser maneni putu aika ajungmesotsü.

Pa den külemi inyakdang, ni pa ya ochi tangatetba nung nokdakba, teindang, shisa taka aser temulungsentsü temerek aliba nisung ka ta meteta akum aser pai Constitution wazüka ayu. Pa takum ya bendanga agütsür tenzüka, tesüngjem lenir aser ochi obendang aser telungjem asoshi bendanga agütsüba kuli ka asütsü, ta Dr. Rio-i ashi.

Pa asüba ajanga tazüng

yutsüba kanga jangja metettsü, saka pai tasü ita mapa tajung inyakba bilemteta anisüngzüik angur. Pai State aser linük asoshi mapa tajung inyakba teti akumtsüboa aser tenüngsanga bilemtettsü.

Government of Nagaland aser ozü kibong tenüng nung par mangyimer kibong den asükhu lemsateper. Tulusang Tsüngremi kinunger nem tashi aser anisüngzüik agüjang ta sarasademtsür. Pa tanüla teti tatem maka tesunep nung anisüngzüikjangma, ta CM Rio-isa ashi.

Anogo 7 mangyimtsü :
Asür nem akhum agüja Government of Nagaland-i anogo tenet (August 16-22, 2025) mangyimba alitsü sangdongogo.

Iba mapang national flag teti songa alidak tom ka atsüzüka ayutsü aser 'official' mapa kecha meinyaktsü, ta Chief Secretary, Sentianger Imchen, IAS ajanga sangdong ka nung ashi.

BIEMDANGANG

"Nai memerangdangra temelenshi madoktsü."